

## Script of Evening Gojri News Bulletin 19April 2026 at 1700Hrs

ایوننگ گو جری نیوز بلیٹن مورخہ 19 اپریل 2026

یوہ آکاشوانی جموں بے عبدالمجید تے عبدالرحمان شاہین تیں خبر سُنو پہلاں خاص خاص خبر۔

### Headlines

- \*1۔ عدالتِ عظمیٰ نے سڑکاں غی حفاظت واسطے پورا بھارت مانہ ہدایت جاری کی ہیں تے کہیو ہے جے ایکسپریس ویز خطرہ غی راہداری نہیں بننی چاہیں۔
- \*2۔ لیفٹنٹ گورنر منوج سنہا نے بھگوان پرشورام جینتی تے اکشے تریتیہ غا پُر مسرت موقع ور عوام مانہ مبارکباد دتی ہے ۔
- \*3۔ پونچھ مانہ موک ڈرلز تے بلیک آوٹ مشق پلک تیں شروع ہوئے 24 اپریل تک جاری رہ گی۔
- \*4۔ اُدھم پور منشیات معاملہ مانہ پنجاب غا 2 افراد مانہ 10 سال قید غی سزا سُنائی گئی ہے ۔
- \*5۔ تے وادی کشمیر مانہ تازہ برفباری تے بارش سنگ درجہ حرارت مانہ کمی آئی ہے ۔

خبریں غی تفصیل نال پہلاں عبدالرحمان شاہین۔

### SC Expressways

عدالتِ عظمیٰ نے اس گل غو مشاہدو کرتاں واں جے انتظامی سسٹی یاہ بنیا دی ڈھانچہ غا فاصلہ غی وجہ تیں ایکسپریس ویز مانہ خطرہ غی راہ داری نہیں بنن دینو چاہیے غا سلسلہ مانہ عدالت نے سڑکاں ور حفاظت مانہ بدھان غی کاطر پورا بھارت مانہ بہت سارا رہنما سطور جاری کیا ہیں ۔ ان رہنما سطور مانہ شاہراں ور بڑی گڈیاں مانہ کھلی کرن ور پابندی وی شامل ہے۔ جسٹس جے کے مہیشوری تے اے ایس چندروکر غی بنچ نے نشاندہی کی ہے جے قومی شاہراہ بھارت غی گل سڑکاں غی لمبائی غو دو فیصدی بنے ور سڑک حادثات غی وجہ نال 30 فیصدی موت قومی شاہراں ور ہو ویں۔ بنچ نے سڑکاں تے ٹرانسپورٹ وزارت، قومی شاہراں بارے بھارتی اتھارٹی ( این ایچ اے آئی) تے ریاستاں اور مرکزی انتظام آلا علاقان مانہ سڑکاں مانہ محفوظ بنان غی ہدایت جاری کی ہیں۔

### LG Greetings

لیفٹنٹ گورنر منوج سنہا نے پرشورام جینتی تے اکشے تریتیہ غا موقع ور لوکاں مانہ مبارکباد دتی ہے ۔ سوشل میڈیا ور اک پیغام مانہ پرشورام جینتی غی مبارکباد پیش کرتاں واں کہیو ہے جے پرشورام جی ہمت، قربانی تے انصاف غی علامت ہیں تے اُن غی زندگی ہمنان انسانیت غی خدمت واسطے تیار رہن غی ترغیب دئیے۔ اُنہاں نے اس موقع ور

دُعا کی جے ہر اک زندگی مانہہ خوشی، امن، نوی توانائی تے اچھی صحت ہووے۔ ایل جی نے اکشے یا تریتیا غا پُر مسرت موقع ور سب نانہہ مبارکباد دتی ہے۔

### Parshuram Jayanti

پورا جموں خطہ مانہہ اچ بھگوان پرشو رام جینتی تے اکشے تریتیا مذہبی جوش تے جذبہ سنگ منایو جا رہیو ہے۔ ہر سال ہندو مہینہ ویشاکھ مانہہ شکل پکش غی 3 تا ریخ نانہہ پرشو رام جی غو جنم تیہاڑو منایو جا ئے تے یوہ تیہاڑو نوی شروعات واسطے اچھو سمجھیو جا ئے۔ جموں، کٹھوعہ، سانہہ، پونچھ تے دوجا ضلعان مانہہ یوہ تیہاڑو بڑا جوش و خروش سنگ منایو گیو ہے۔ اس موقع ور پونچھ مانہہ انیا پورنا مندر مانہہ بھگوان پرشو رام غی مورتی نصب کی گئی۔ سناتن دھرم سبھا پونچھ غا صدر کھیتر پال شرمانے اس موقع ور بولتاں وان اس طرح کہیو۔۔۔ بانٹ۔۔۔ اواں اُدھم پور مانہہ وی بھگوان پرشو رام جینتی منائی گئی۔ اس موقع ور شہر مانہہ اک شاندار شوبھا یا ترا کڈی گئی۔ میڈیا نال گل کرتاں وان ڈی آئی جی اُدھم پور ریاسی رینج شیو کمار شرمانے کہیو۔۔۔ بانٹ۔۔۔ اواں سانہہ تین مہارا نامہ نگار غی تہواراں غا منایا جان غا بارا مانہہ پیش ہے یاہ رپورٹ۔۔۔

### Mock Drill Poonch

ضلع پونچھ مانہہ شہری دفاع غا فضائی حملہ تے بلیک آؤٹ غے متعلق اک عملی مشق منعقد کی جائے گی۔ ڈپٹی کمشنر پونچھ غا دفتر نے اس مشق غا حوالہ سنگ اک سرکاری اعلانیا جاری کیو ہے۔ جس غے مطابق یاہ مشق پلک تین شروع ہو غے 24 اپریل تک جاری رہے گی۔ حکم نامہ مانہہ کہیو گیو ہے جے یاہ مشق سول دفاع تے ایس ڈی آر ایف حکام تین موصولہ ہدایات غے تحت کی جا رہی ہے۔ انتظامیہ نے عوامی بیداری ٹھہرن و نقل و حمل غا انتظامات تے بین المحکماتی ہم آہنگی غی ضرورت ور زور دتو ہے، تانجے مشق نانہہ بخوبی انجام دتو جا سکے۔ محکمان نانہہ ہدایت دتی گئی ہے جے وے اپنی کاروائیاں غی رپورٹ جمع کراویں، تانجے انہاں نانہہ اعلیٰ عہدیداراں نانہہ آگے ارسال کیو جا سکے۔

### Ito-SMHS Visit

صحت تے طبی تعلیم غی وزیر سکینہ اتونے اچ ایس ایم ایچ ایس ہسپتال غو دورو کیو تانجے ممبر پارلیمنٹ شیخ عبدالرشید المعروف انجینئر رشید غا بیمار والد غی صحت غے بارے معلومات حاصل کی جا سکے۔ ایم ایل اے حضرت بل سلمان ساگر، پرنسپل گورنمنٹ میڈیکل کالج سرینگر ڈاکٹر افت حسین شاہ، میڈیکل سپرنٹینڈنٹ ایس ایم ایچ ایس ڈاکٹر اندلیپ بشیر بکھ بکھ شعبان غا سربراہان کنسلٹنٹ، سینئر ڈاکٹر تے دوجو عملو وی اس موقع ور ات موجود تھو۔ اپنا دورہ غے دوران سکینہ اتونے زیر علاج مریض خضر محمد شیخ غی حالت، علاج غا منصوبہ تے صحت یابی غی پیش رفت غا بارے تفصیلی جانکاری حاصل کرن واسطے ڈاکٹراں تے طبی عملہ سنگ ملاقات کی۔

مزید خبراں نال عبدالمجید ور اس تین پھلاں اک سنو۔

### Conviction

اُدھم پور غی اک عدالت نے پنجاب غا 2 بین ریاستی منشیات فروشاں نانہہ این ڈی پی ایس 2020 ایکٹ کیس مانہہ سزا سنائی ہے۔ پولیس ذریعاں نے دسیو ہے جے اس معاملہ

مانہہ ہر ایکن نانہہ 10 سال قید غی سزا سُنائی گئی ہے۔ یہ دویے مجرم جسپریت سنگھ تے سندپ سنگھ لدھانہ غا رہن آلا ہیں تے ان نانہہ 1/1 لکھ روپیو جرمانو وی کیو گیو ہے۔ پولیس نے دسیو ہے جے آدائیگی نہ کرن غی صورت مانہہ انہاں نانہہ مزید 6 مہیناں غی قید و مشقت غی سزا دتی جائے گی۔ ان دوہاں مُجرماں نانہہ 9 ستمبر 2020 نانہہ جموں سرینگر قومی شاہراہ ور 175 گرام بھکی سمیت حراست مانہہ اُس وقت پکڑیو گیو تھو جد وے کشمیر تیں واپس آریا تھا۔

## JJM

جل جیون مشن بارے ایوانی کمیٹی جس غی قیا دت حسنین مسعودی کر رہیا ہیں نے ضلع ریاسی غا پونی علاقہ غو دورو کیو، تانجے عوام تیں پانی غی فراہمی تے جل شکتی سکیمیاں غا نفاذ غے متعلق شکایات سنی جا سکیں۔ اس دورہ غے دوران مقامی لوکاں نے پین غا پانی غی سہولیات پروجیکٹاں غی تکمیل مانہہ تاخیر تے مرمت و سام سنبھال بارے بکھ بکھ مسائل چایا۔ کمیٹی نے عوام نانہہ یقین دویو جے ان غی شکایتاں نانہہ ترجیحی بنیاداں ور دیکھیو جائے گو تے جل جیون مشن غے تحت سکیمیاں غا موثر نفاذ واسطے ضروری اقدامات کیا جائیں گا۔ ذرائع ابلاغ سنگ گل بات کرتاں وان کمیٹی غا سربراہ ممیر قانون ساز اسمبلی حسنین مسعودی نے اس طرح کہیو۔ بانٹ۔۔۔

## Refresher Course

ٹائگر ڈویزن غے زیر انتظام جموں کشمیر پولیس غا اہلکاراں واسطے اک مشترکہ انسداد بغاوت، انسداد دہشت گردی ریفریشر کورس اختتام پذیر ہو گیو ہے۔ یوہ کورس 7 اپریل نانہہ شروع ہوئو تھو تے بھارتی فوج تے جموں کشمیر پولیس غی اعلیٰ قیا دت غی طرفوں مشترکہ طور ور تیار کیو وہ تھو۔ میراں صاحب برگیڈ غی طرفوں منعقد کیا گیا اس سخت تربیتی کورس مانہہ 108 پولیس اہلکاراں نانہہ تربیت دتی گئی ہے۔ کورس غے دوران کھٹ افراد ور مشتمل ٹیم غی کاروائیاں، گشت کرن، ٹیم غو تا ولاں رد عمل کرن، گشتی گڈی، چیک پوسٹ غی مشق، چھپ غے حملو کرن غی تکنیک کھیرا بندی تے تلاشی کاروائیاں وغیرہ غی تربیت دتی گئی ہے۔

## Book Release

ڈوگری سنستھا غی طرفوں اج سابق نامور ریڈیو براڈ کاسٹر و ڈوگری ادیب نریندر بھسین غی کہانیاں غا مجموعہ "ارکھے دی بیل" تے چنچل بھسین ہوراں غی بچاں واسطے نظاماں غا مجموعہ "تاریں دی چل مل" تے "گنڈیلے دے پُهل" غو اجراع کیو گیو ہے۔ اس موقع ور سابقہ آئی اے ایس افسر بی آر شرما مہمان خصوصی تھا، جد کہ پروگرام غی صدارت ڈوگری سنستھا غا صدر پدم شری لالت مگوترہ نے کی۔ ڈوگری ادیبہ پروفیسر وینہ گپتا، ڈاکٹر آشوک کھجوریہ تے وجے کمار بجاج نے کتاباں غو تنقیدی جائزو پیش کیو۔ اپنی کتاب بارے گل کرتاں وان نریندر بھسین نے اس طرح کہیو۔ بانٹ۔۔ آکاشوانی جموں غا خبراں آلا شعبہ سنگ گل کرتاں وان چنچل بھسین ہوراں نے اس طرح کہیو۔ بانٹ۔۔۔

## Weather

کشمیر غا بالائی علاقاں مانہہ تازہ برفباری تے میدانی علاقاں مانہہ بارش ہون نال درجہ حرارت مانہہ کمی آئی ہے۔ محکمہ موسمیات نے دسیو ہے جے ضلع بانڈی پورہ مانہہ

گریز وادی گا تولیل علاقہ ، گاندر بل ضلع غا سونہ مرگ علاقہ مانہہ زوجیلا درہ غے  
نیڑے اور راجوری پونچھ نانہہ وادی غا ضلع شوپیاں نال جوڑن آلی مغل شاہراہ ور برف  
باری ہوئی ہے تے وادی غا میدانی علاقہ مانہہ سویرے ہلکی تیں درمیانہ درجہ غی  
بارش ہوئی ہے ۔

-----

اس غے نال ہی خیراں غو یوہ بلیٹن ختم ہوؤ۔